

BOSNIA AND HERZEGOVINA
FEDERATION OF BOSNIA AND HERZEGOVINA
GOVERNMENT

Na osnovu člana 20. stav 4. Zakona o udruženjima i fondacijama („Službene novine Federacije BiH“, broj 45/02), a u vezi sa članom 8. stav 2. Odluke o osnivanju Fondacije za sport („Službene novine Federacije BiH“ broj: 71/11) Vlada Federacije Bosne i Hercegovine na 34 sjednici, održanoj 24. 01. 2012. godine, donosi

STATUT
FONDACIJE ZA SPORT

I- OSNOVNE ODREDBE

Član 1.

Ovim Statutom uređuju se:

- 1) naziv i sjedište Fondacije za sport (u daljem tekstu: Fondacija);
- 2) ciljevi i djelatnost Fondacije;
- 3) organi Fondacije, njihova ovlaštenja, način imenovanja i opoziva članova organa Fondacije, trajanje mandata, kvorum i pravila glasanja, uključujući specifična pitanja o kojima se odlučuje kvalifikovanim većinom;
- 4) zastupanje i predstavljanje Fondacije;
- 5) oblik i sadržaj pečata Fondacije;
- 6) oblik i sadržaj znaka Fondacije;
- 7) pravila korištenja sredstava Fondacije;
- 8) mogući korisnici sredstava Fondacije;
- 9) postupak za donošenje Statuta, izmjene i dopune Statuta i drugih općih akata Fondacije;
- 10) način usvajanja i podnošenja finansijskog izvještaja i izvještaja o radu Fondacije;
- 11) uslovi i postupak za pripajanje, razdvajanje, transformaciju ili prestanak rada Fondacije;
- 12) pravila za raspodjelu imovine Fondacije u slučaju prestanka rada Fondacije;
- 13) druga pitanja značajna za rad Fondacije.

II- NAZIV I SJEDIŠTE FONDACIJE

Član 2.

Naziv Fondacije je: Fondacija za sport.

Sjedište Fondacije je u Sarajevu, ulica Obala Maka Dizdara broj 2.

III- CILJEVI I DJELATNOST FONDACIJE

Član 3.

Osnovni ciljevi Fondacije su podsticanje, razvoj, unapređivanje i modernizacija sporta i sportskih djelatnosti, a naročito u domenu:

- utvrđivanja instrumenata i procedura za transparentno korištenje sredstava Fondacije,
- stvaranja kvalitetnijih prostornih i tehničkih pretpostavki u oblasti sporta i sportskih djelatnosti kroz podršku programima i projektima izgradnje, rekonstrukcije, adaptacije i opremanja sportskih objekata i sl.,
- stvaranja uslova za prezentaciju vrhunskog sportskog stvaralaštva i ostvarivanje vrhunskih sportskih rezultata,
- podsticanja sistematskog i organizovanog bavljenja sportom u slobodno vrijeme,
- povezivanja i razmjene informacija i iskustava sa sličnim asocijacijama van granica Federacije BiH,
- podrške programima i projektima koji doprinose vaspitanju, obrazovanju i razvoju djece i omladine,
- učestvovanja u utvrđivanju strategija i programa razvoja sporta,
- podrške programima i projektima razvoja sportskih aktivnosti osoba sa invaliditetom,
- podrške programima i projektima učešća na domaćim i međunarodnim sportskim takmičenjima,
- edukacije i stručnog usavršavanja kadrova u sportu,
- izdavačke djelatnosti u oblasti sporta,
- podrške nekomercijalnih programa i projekata.

IV - ORGANI FONDACIJE, NJIHOVA OVLAŠTENJA, NAČIN IMENOVANJA I OPOZIVA ČLANOVA ORGANA FONDACIJE, TRAJANJE MANDATA, KVORUM I PRAVILA GLASANJA, UKLUČUJUĆI I SPECIFIČNA PITANJA O KOJIMA SE ODLUČUJE KVALIFIKOVANOM VEĆINOM

Član 4.

Organ upravljanja Fondacijom je Upravni odbor.
Upravni odbor čine predsjednik i dva člana.

Član 5.

Predsjednika i članove Upravnog odbora imenuje Vlada Federacije Bosne i Hercegovine na prijedlog federalnog ministra kulture i sporta, iz reda sportskih i drugih javnih ličnosti.

Mandat predsjednika i članova Upravnog odbora Fondacije traje četiri godine, s tim da mogu biti još jednom imenovani nakon isteka mandata.

Predsjednik i članovi Upravnog odbora primaju naknadu za rad u Upravnom odboru, u skladu sa Pravilnikom o naknadama za rad na poslovima Fondacije.

Član 6.

Osnivač može, na prijedlog federalnog ministra kulture i sporta, razriješiti predsjednika i članove Upravnog odbora i prije isteka mandata, na njihov lični zahtjev, te ako se utvrdi da je odgovoran za nezakonit ili neuspješan rad Fondacije.

Osnivač imenuje privremenog člana Upravnog odbora na mjesto razriješenog člana, na prvoj narednoj sjednici, na prijedlog federalnog ministra kulture i sporta, do provođenja procedure u skladu sa članom 7. ovog statuta.

Član 7.

Postupak imenovanja i razrješenja predsjednika i članova Upravnog odbora Fondacije vrši se u skladu sa Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br.12/03 i 34/03).

Član 8.

Upravni odbor vrši sljedeće poslove:

- ostvaruje ciljeve Fondacije utvrđene ovim Statutom;
- daje saglasnost na pravne radnje preuzete u ime Fondacije prije njenog upisa u registar;
- upravlja imovinom Fondacije;
- vrši izmjene i dopune Statuta uz prethodnu saglasnost federalnog ministra kulture i sporta;
- imenuje lice ovlašteno za zastupanje i predstavljanje Fondacije;
- odlučuje o angažovanju stručnih lica u Fondaciji;
- odlučuje o pravima, obavezama i odgovornosti iz radnog odnosa za zaposlena stručna lica u Fondaciji;
- predlaže osnivaču pripajanje, razdvajanje, transformaciju ili prestanak rada Fondacije;
- priprema finansijske i druge izvještaje;
- donosi planove poslovanja Fondacije;
- utvrđuje poslovnu politiku i strategiju razvoja Fondacije;
- donosi godišnje programe rada;
- odlučuje o raspodjeli i upotrebi sredstava;
- donosi Pravilnik o procedurama i kriterijima za izbor korisnika sredstava Fondacije;
- donosi Poslovnik o radu Upravnog odbora Fondacije;
- donosi Pravilnik o naknadama za rad na poslovima Fondacije;
- donosi i druge akte iz nadležnosti rada Fondacije;
- radi i druge poslove u skladu sa ovim Statutom i zakonom.

Član 9.

Upravni odbor održava redovne i vanredne sjednice.

Vrijeme održavanja redovnih sjednica, za koje se dostavljaju pozivi članovima, utvrđuje se Poslovníkom o radu Upravnog odbora Fondacije.

Vanredne sjednice se sazivaju na temelju pismeno obrazloženog zahtjeva.

Sjednice Upravnog odbora saziva predsjednik Upravnog odbora, u skladu sa Poslovníkom o radu Upravnog odbora.

Predsjednik je dužan zakazati sjednicu, na prijedlog premijera Vlade Federacije Bosne i Hercegovine, federalnog ministra kulture i sporta i najmanje dva člana Upravnog odbora, u skladu sa Poslovníkom o radu Upravnog odbora.

Član 10.

Upravni odbor odlučuje o svim pitanjima većinom glasova ukupnog broja članova, ukoliko ovim Statutom i Poslovníkom o radu Upravnog odbora nije drugačije propisano.

O svim pitanjima Upravni odbor odluke donosi nakon diskusije i usaglašavanja stavova.

Nakon što se odluka donese potrebnom većinom svi članovi Upravnog odbora dužni su je se pridržavati.

Član 11.

U slučaju sukoba interesa predsjednika ili člana Upravnog odbora proisteklog iz članstva u nekom tijelu ili organu, ili ličnim odnosom s nekom osobom ili institucijom, a u vezi sa predmetom rasprave i odlučivanja Upravnog odbora, predsjednik odnosno član obavezni su iskazati sukob interesa.

U slučaju sukoba interesa predsjednika ili člana Upravnog odbora, Upravni odbor ne može odlučivati o tom pitanju, o čemu je dužan obavijestiti podnosioca zahtjeva.

Za svoj rad i rezultate rada, Upravni odbor odgovoran je Vladi Federacije Bosne i Hercegovine.

Član 12.

Prisutnost predsjednika i svih članova Upravnog odbora Fondacije je obavezna za donošenje sljedećih odluka:

- o upravljanju imovinom Fondacije,
- o izmjenama i dopunama Statuta Fondacije i
- o pripajanju, razdvajanju, transformaciji ili prestanku rada Fondacije.

V – STRUČNI I ADMINISTRATIVNO - TEHNIČKI POSLOVI

Član 13.

Stručne i administrativno - tehničke poslove za potrebe Fondacije obavljaju kvalifikovana stručna lica putem ugovora o radu.

Lica koja će obavljati ove poslove bira Upravni odbor Fondacije na prijedlog federalnog ministra kulture i sporta.

Prava, obaveze i odgovornosti iz radnog odnosa zaposlenih u Fondaciji regulišu se posebnim pravilnikom u skladu sa Zakonom o radu Federacije BiH („Službene novine Federacije BiH“, br. 43/99, 32/00 i 29/03).

Član 14.

Stručni i administrativno - tehnički poslovi za potrebe Fondacije su:

- pravni i administrativno - tehnički,
- finansijsko računovodstveni poslovi.

Pravne i administrativno - tehničke poslove obavlja diplomirani pravnik.

Finansijsko računovodstvene poslove obavlja diplomirani ekonomista.

Zaposlena stručna lica staraju se o realizaciji zakonskih obaveza, rokovima za izvršavanje tih obaveza i o tome blagovremeno izvještavaju Upravni odbor Fondacije.

Za svoj rad zaposlena stručna lica odgovaraju Upravnom odboru Fondacije.

VI – OBLIK I SADRŽAJ PEČATA FONDACIJE

Član 15.

Fondacija ima pečat i štambilj.

Pečat Fondacije je okruglog oblika, promjera 35 mm, na čijem obodu je ispisan slijedeći tekst: „Fondacija za sport“, a vodoravno u sredini pečata, „Sarajevo“, kao sjedište Fondacije.

Štambilj Fondacije je pravougaonog oblika 60 x 30 mm i sadrži naziv i sjedište Fondacije: „Fondacija za sport– Sarajevo“, te „Broj“ i „Datum“, sa prostorom za upisivanje broja i datuma.

VII – PRAVILA KORIŠTENJA SREDSTAVA FONDACIJE I MOGUĆI KORISNICI SREDSTAVA FONDACIJE

Član 16.

Pravilnik o procedurama i kriterijima za izbor korisnika sredstava Fondacije (u daljem tekstu: Pravilnik) je akt kojim se obezbjeđuje transparentno korištenje sredstava Fondacije radi ostvarivanja ciljeva Fondacije.

Pravilnik donosi Upravni odbor većinom glasova ukupnog broja članova.

Pravilnik se objavljuje u «Službenim novinama Federacije BiH».

Član 17.

Pravilnik obavezno sadrži:

- osnove za korištenje sredstva Fondacije;
- način raspoređivanja sredstava po različitim osnovama;

- kriterije za izbor korisnika sredstva Fondacije;
- proceduru za izbor korisnika sredstava Fondacije;
- druga pitanja značajna za zakonit i efikasan rad Fondacije.

Član 18.

U svrhu kontrole namjenskog korištenja sredstava od strane korisnika sredstava Fondacije, Upravni odbor će Pravilnikom ustanoviti instrumente i način provjere.

VIII – NAČIN USVAJANJA I PODNOŠENJA FINANSIJSKOG IZVJEŠTAJA I IZVJEŠTAJA O RADU

Član 19.

Upravni odbor za svaku poslovnu godinu donosi finansijski plan Fondacije, koji je sastavni dio godišnjeg programa rada Fondacije.

Program rada i finansijski plan usvaja Upravni odbor većinom ukupnog broja članova.

Na kraju poslovne godine donosi se godišnji obračun po istom postupku kao i finansijski plan.

Član 20.

Plan poslovanja Fondacije zajedno sa finansijskim planom i godišnjim planom rada, te izvještajem o radu sa godišnjim obračunom, podnose se jednom godišnje Vladi Federacije Bosne i Hercegovine putem Federalnog ministarstva kulture i sporta.

Član 21.

U Fondaciji se uredno vode poslovne knjige i sastavljaju finansijski izvještaji u skladu sa zakonom i drugim propisima.

Član 22.

Nadzor nad namjenskim korištenjem i raspolaganjem sredstvima Fondacije vrši Federalno ministarstvo finansija-Federalno ministarstvo financija.

IX – USLOVI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA FONDACIJE

Član 23.

Fondacija prestaje sa radom kada prestane svrha njenog osnivanja.

Vlade Federacije Bosne i Hercegovine donosi odluku o pripajanju, razdvajanju, transformaciji ili prestanku rada Fondacije.

Odlukom o prestanku rada Fondacije utvrđuje se način zaštite prava korisnika sredstava Fondacije i druga pitanja od značaja za prestanak rada Fondacije.

X – PRAVILA ZA RASPODJELU IMOVINE FONDACIJE U SLUČAJU PRESTANKA RADA FONDACIJE

Član 24.

U slučaju prestanka rada Fondacije odluku o raspodjeli preostale imovine Fondacije donosi Vlada Federacije Bosne i Hercegovine, na prijedlog federalnog ministra kulture i sporta.

Ukoliko Vlada Federacije ne donese odluku o raspodjeli imovine Fondacije do dana brisanja iz registra, preostala njena imovina dodjeljuje se drugoj fondaciji koja obavlja istu ili sličnu djelatnost, a registrovana je na području Federacije Bosne i Hercegovine.

Odlukom iz stava 1. ovog člana reguliše se način ostvarivanja ranije stvorenih prava i obaveza Fondacije.

XI - OSTVARIVANJE JAVNOSTI RADA FONDACIJE

Član 25.

Rad Fondacije je javan, a ostvarivanje ovog načela ne može biti u suprotnosti sa interesima i poslovanjem Fondacije.

Član 26.

Javnost rada Fondacije ostvaruje se podnošenjem izvještaja o radu i finansijskom poslovanju Federalnom ministarstvu kulture i sporta i Vladi Federacije Bosne i Hercegovine.

Član 27.

Predsjednik Upravnog odbora ili lice koje ovlasti Upravni odbor može davati podatke i obavještavati sredstva javnog informisanja, kao i odlučivati o sazivanju konferencija za štampu i ostvarivati druge vidove saradnje sa sredstvima javnog informisanja.

XII - PRIJELAZNE I ZAVRŠNE ODREDBE

Član 28.

Ovaj Statut stupa na snagu danom donošenja.

V. broj: 149 /2012
24.01.2012. godine
Sarajevo



Mirza
Kokotović
Z. Imamović